



Rabu, 04 Oktober 2023

Ogen: Amos 9:7-10



I Sigi Bagi Page



Ibas paksa si genduari banci saja enggo mesera siakap ndarami ndiru adi si kirumah kirumahi. Lanai bo piga lit ndiru i rumahta. Nai perbahan kita nukur beras ku mesin entah nggilingken page ku mesin perlu kita ndiru guna miari beras si enggo gilingken e. Tupung page e igiling la kerina lepas kulitna, e maka perlu ipiari gelah kulit-kulitna ndai lepasen. Biasana adi lit denga kulit page e minter iambekken, la ikut itangger jadi nakan. Beras e ipiari ras isigi gelah mesunah ngidahsa entah lit batu bas beras e, entah sesa. Ertina melala si man ambengenken i bas beras e nari. Genduari perbahan enggo nukur beras bas grosir entah mall, lanai perlu ipiari cukup icuci saja enggo banci tangger.

Isigi, biasana kenca dung ipiari. Tupung page e ipiari enggo me ndabuhen lapung-lapungna, kenca si e isigi gelah kerina si la mejile teridah. Em anding-andingen si ibahan Tuhan nandangi bangsa Israel. Bali nge kecibal bangsa Israel ras bangsa-bangsa si Sudan, Pilisti, Sirya ras sidebanna. Adi bangsa e ngelakoken kejahatanen tetap ndatken ukumen. Tapi teridah maka Tuhan e adil, si jahat nge si iukmna, la sada pe banci pulah. Adi lit bangsa Israel si ndalanken kebujuren ipulahiNa nge i bas ukumen e nari. Uga carana ngidah bangsa si ngelakoken kebujuren ras si la ngelakoken kebujuren? Isigi Tuhan bagi page. Bangsa si erpengakap maka ia labo banci kena cilaka, enda me si iukum Tuhan. Sabap lit kesombongen i bas ia. Pengakapna adi enggo bangsa Dibata lanai kena ukum amin pe ia ngelakoken si jahat. Tuhan labo banci imain-mainken. Aminna pe kita enggo Kristen, tapi adi lagu langkahta la bagi arusna kalak Kristen, tetap nge ngaloken ukumen.